

Saopštenje za javnost

Zajedničko koordinaciono tijelo udruženja sudija i tužilaca u Bosni i Hercegovini

Sarajevo, 20.01.2021. godine,

Zajedničko koordinaciono tijelo udruženja sudija i tužilaca u BiH (ZKT) je saopštenjem za javnost od 27. 11. 2020. godine pod tačkom III. najavilo da će povodom novih imenovanja u Visoko sudsko i tužilačko vijeće Bosne i Hercegovine (VSTV) ponuditi prijedloge za optimiranje procedura i uslova za imenovanja kako su predviđena *Pravilnikom o izboru članova Visokog sudskog i tužilačkog vijeća Bosne i Hercegovine* (Pravilnik).

Na proširenom sastanku od 21. decembra/prosinca 2020. godine ZKT je razmatralo važeći Pravilnik i ponovo ističe da on ne osigurava najadekvatniji i najtransparentnije okvir za imenovanje na ovako važne i odgovorne funkcije. ZKT je mišljenja da je dosadašnja praksa imenovanja članova VSTV-a dovela do neformalnih i suptilnih pritisaka i neprimjerenih utjecaja iz pravosuđa na sudije i tužioce kako bi se opredijelili za imenovanje određenog kandidata ili kandidatkinje. ZKT također ponavlja da je simptomatično odsustvo bilo kakve odgovornosti ili konstruktivne komunikacije izabranih članova VSTV-a sa izbornom bazom za vrijeme mandata u VSTV-u.

Udruženje tužilaca/tužiteljica FBIH, Udruženje žena sudija u BiH, Udruženje sudija/sudaca u Federaciji BiH i Udruženje sudija u Bosni i Hercegovini kao članice ZKT-a, upućuju sljedeću inicijativu prema VSTV-u:

1. *Neophodno je inicirati postupak hitnih izmjena i dopuna Pravilnika o izboru članova Visokog sudskog i tužilačkog vijeća BiH u skladu sa zakonom.*
2. *Izmjenama i dopunama Pravilnika o izboru članova Visokog sudskog i tužilačkog vijeća moraju se, prije svega, predvidjeti:*
 - a. *detaljniji uvjeti i procedure organizacije izbora članova Vijeća za sudije i tužioce, kandidiranja kandidata, javnog predstavljanja kandidata biračima i široj sudačko-tužilačkoj zajednici, te omogućiti uvid u njihove radne rezultate i eventualne utvrđene disciplinske prekršaje, te preporuka ministarstvima pravde, parlamentarnim skupštinama i advokatskim komorama da svoje pravilnike o izboru njihovih članova VSTV-a usklade sa ovim prijedlozima i sugestijama.*
 - b. *duži i fleksibilniji rokovi u postupku kandidiranja kandidata (najmanje tri mjeseca) i izbora,*
 - c. *mogućnost preispitivanja neregularnosti u postupku izbora.*

Dodatno, u kontekstu člana 4. stav (2) Zakona o VSTV, koji predviđa da su članovi Vijeća „osobe visokih moralnih kvaliteta i profesionalne nepristranosti, poznate po djelotvornosti, stručnosti i profesionalnoj nepristranosti“, potrebno je normativno (zakonski i/ili podzakonski) detaljnije precizirati uvjete za kandidaturu sudija i tužilaca, te pozvati zakonodavnu i izvršnu vlast, te predstavnike entitetskih



advokatskih komora da proces izbor svojih predstavnika u VSTV učine transparentnim. Također, potrebno je naglasiti obavezu izabranih članova Vijeća da nakon izbora u VSTV, redovno informišu i komuniciraju sa izbornom bazom.

Podnosioci inicijative ističu da se kandidati za članove VSTV-a, koji se biraju na četiri godine, trebaju predstaviti sudijama i tužiocima u otvorenom forumu sa planom i programom, koji omogućuje javnu diskusiju o temama iz pravosuđa i pruža mogućnost da se dobije utisak o integritetu i znanju, vještinama i sposobnostima kandidata. Naš je cilj da se u predstojećim izborima članova VSTV-a, sudije i tužioci svjesno i savjesno kandidiraju i da se izaberu najbolji, najstručniji i najmoralniji među nama. U tom smislu, pozivamo VSTV da hitno pristupi izmjenama i dopunama pomenutog Pravilnika, kako bi se osigurao transparentniji izbor članova Vijeća u 2021. godini, uzimajući u obzir da u junu, odnosno septembru 2021. godine ističu mandati članovima Vijeća iz Brčko distrikta BiH, te članovima Vijeća ispred kantonalnih tužilaštava i Republičkog javnog tužilaštva RS.

ZKT ili pojedine članice ZKT-a će u januaru 2021. godine izići sa konkretnim prijedlozima za izmjene Pravilnika, te se stavlja VSTV-u sa punim kapacitetima na raspolaganje s ciljem iznalaženja najboljih rješenja.

S poštovanjem,

Zajedničko koordinaciono tijelo udruženja sudija i tužilaca u Bosni i Hercegovini